



City 8 Compound, Rua Has-Laran, Aldeia Fomento II, Suco Comoro, Dom Aleixo, Dili, Timor-Leste
PO Box 113, Telephone: +670 73099995 / 73099996/73099997

KOMUNIKADU IMPRENSA

ANP Partisipa iha OGA 2026 no Organiza Forum ba Negósiu no Investimentu Timor-Leste iha Kuala Lumpur, Malaysia

Autoridade Nacional do Petróleo (ANP) marka nia partisipasaun iha Oil and Gas Asia (OGA) 2026, eventu indústria petróleo, gás, enerjia no petrokímika prinsipál Ázia nian, ne'ebé hala'o iha loron 2 to'o 4 fulan-setembru tinan 2026 iha Sentru Konvensaun Kuala Lumpur, Malázia.

Durante iha OGA, ANP ho TIMOR GAP E.P. hamutuk organiza eventu sekundáriu ho tema “Fórum Negósiu no Investimentu Timor-Leste”. Forum ne'e fó oportunidade ba ANP, TIMOR GAP E.P., TradeInvest husi Timor-Leste, inklui representante husi operadór sira (FINDERS) no kompañia servisu sira (WESTARGAP), hodi fahe hanoin no envolve ho audiénsia kona-ba oportunidade investimentu no halo negósiu iha indústria petrolífera Timor-Leste nian.

Fórum ne'e loke formalmente hosi Vise-Presidente ANP nian ba asunto Kontiúdu Lokal no Relasaun Parseria, Sr. Quintino Pereira Bere, tuir fali ho diskursu prinsipál ida hosi S.E. Embaixadór Timor-Leste iha Malázia, Sr. Lisualdo Gaspar. Eventu ne'e remata ho diskursu enseramentu husi Vise Presidente TIMOR GAP E.P. ba Teknolojia & Dezenvolvimentu Patrimóniu, Sr. Domingos Lequisiga. Fórum ne'e hetan partisipasaun husi partisipante liu 100, inklui representante governu, ezekutivu empresariál sira iha ASEAN tomak, partikularmente Malázia, no parte interesada prinsipál sira husi indústria mina no gás.

Aleinde ne'e, ANP hala'o sesaun negosiasaun ida ho fornecedor potenciál sira Malázia nian, ho objetivu atu haree oportunidade sira kontratu nian iha sasán no servisu sira, no introdús Sentru Servisu Apoio ba Empreza (ESSC), plataforma dijital ida ne'ebé dezeña atu sai hanesan sentru sentralizadu ida hodi liga fornecedor internasionál sira ho fornecedor nasional sira no fasilita oportunidade boot liu ba parseria negósiu no maximiza partisipasaun lokal iha gás no petróleo.

Sesaun Negosiasaun ne'e halibur partisipante liu 60 ne'ebé representa fornecedor servisu Malázia sira hosi indústria mina no gás, hodi fornese plataforma ida ne'ebé iha valór atu troka informasaun no esplora oportunidade negósiu potenciál sira.

Durante espozisaun OGA, ANP hatudu Timor-Leste nia setór petrolíferu no operaun petrolíferu ne'ebé la'o daudaun, hodi destaka potenciál petrolíferu nasaun nian nu'udar destinu atrativu ba investimentu enerjétiku. ANP mós hetan representasaun iha sesaun Speak OGA husi Sr. Francelino Conceição, Diretor Ezekutivu Explorasaun no Dezenvolvimentu, ne'ebé hato'o apresentasaun kona-ba oportunidade investimentu mina no gás Timor-Leste nian. Ninia apresentasaun destaka esforsu sira ne'ebé hala'o hela atu rejuvena enkuadramentu legál no fiskál nasaun nian hodi hasa'e kompetitividade no atratividade investimentu nian, no mós preparasaun



City 8 Compound, Rua Has-Laran, Aldeia Fomento II, Suco Comoro, Dom Aleixo, Dili, Timor-Leste
PO Box 113, Telephone: +670 73099995 / 73099996/73099997

sira ba Lisensiamentu Ronda datoluk Timor-Leste nian ne'ebé planeia ona ba tinan
2027.*****Remata**